

每週經課朗誦經文(巴克禮漢羅/教羅)2014/02/23

共同經課 - 1

利未記十九章一節~二節，九節~十八節

1 耶和華吩咐摩西講：2 你 tiòh 吩咐以色列全會對 in 講：Lín tiòh 做聖，因為我耶和華 lín ê 上帝是聖。9 Lín 收割田 ê 五穀，田 ê 角頭 m̄-thang 割到盡，ka-lauh-ê 也 m̄-thang 拾。10 葡萄園果子 m̄-thang 挽了了，也 m̄-thang 拾葡萄所 lak ê 果子；tiòh 留 hō sòng-hiong 人 kap 出外 ê；我是耶和華 lín ê 上帝。11 Lín m̄-thang 偷 thèh；m̄-thang 欺騙；大家 m̄-thang 講白賊。12 Lín m̄-thang kí 我 ê 名 lâm-sám chiù -choā，來褻瀆你 ê 上帝 ê 名；我就是耶和華。13 M̄-thang 欺負你 ê 厝邊，也 m̄-thang 搶 thèh 伊 ê 物；做工人 ê 工錢 m̄-thang 留 tī 你 hia kui 暝到天光。14 M̄-thang 罵臭耳人 ê，也 m̄-thang hē 塞礙 ê 物 tī chhiⁿ-mī 人 ê 面前；tiòh 敬畏你 ê 上帝；我就是耶和華。15 Lín 審判 m̄-thang 無公道；m̄-thang 偏袒 sòng-hiong 人，也 m̄-thang 看重有勢力 ê 人；tiòh 照公道審判你 ê 厝邊。16 M̄-thang tī 你 ê 百姓 ê 中間四界行毀謗人；也 m̄-thang 做干證 ài 害死你 ê 厝邊；我就是耶和華。17 你 m̄-thang 心內怨恨你 ê 兄弟；的確 tiòh 責備你 ê 厝邊，免得為 tiòh 伊擔當罪。18 M̄-thang 報仇，也 m̄-thang 埋怨你本國 ê 百姓；tiòh 疼厝邊親像家己；我就是耶和華。

共同經課 - 2

詩篇一百一十九篇三十三節~四十節

33 耶和華 ah，求你將你律例 ê 路指示我；我 beh 徹底遵守。34 求你 hō 我智慧，我就守你 ê 律法；Koh beh 專心執守。35 求你 hō 我行你誠命 ê 路，因為 chit-ê 路是我所歡喜 ê。36 求你 hō 我 ê 心 ñg 你干證 ê 話，無 ñg 不義 ê 錢財。37 求你 hō 我 ê 目睭 oát 走，無看虛假；Koh hō 我 tī 你 ê 路中來活。38 你 ê 奴僕敬畏你，求你為伊堅固你 ê 話。39 求你 hō 我所 kiaⁿ ê 凌辱離開我；因為你 ê 判詞是好。40 我欣慕你教示 ê 話；求你，tī 你 ê 公義，hō 我來活。

共同經課 - 3

哥林多前書三章十節~十一節，十六節~二十三節

10 照上帝所賞賜我 ê 恩，我親像智慧 ê 師傅頭有 hē 地基；別人起 tī hit 頂面。總是 tak 人 tiòh 謹慎怎樣起伊。11 因為所 hē ê 地基以外無人會 hē 別個地基，地基就是耶穌基督。16 Kiám m̄ 知 lín 是上帝 ê 殿，上帝 ê 神 tiàm-tī lín 內面 mah？17 人若毀壞上帝 ê 殿，上帝 beh 毀壞伊；因為上帝 ê 殿是聖，殿就是 lín chiah-ê。18 人 m̄-thang 家己騙，lín 中間若有人掠家己 tī chit 世間做有智慧，就 tiòh 成做蠢，thang 成做有智慧。19 因為 chit 世間 ê 智慧照上帝看是蠢；因為有記載講，Hō chiah-ê 智慧 ê 人中 in 家己 ê 詭譎 ê；20 koh 講，主知有智慧 ê 人 ê 念頭是空空。21 所以 m̄-thang 將人來誇口；因為萬物是 lín ê；22 無論保羅、亞波羅、磯法、世界、活、死、現今 ê、將來 ê，lóng 是 lín ê；23 lín 是基督 ê，基督是上帝 ê。

共同經課 - 4

馬太福音五章三十八節~四十八節

38 Lín bat 聽見有話講，目睭賠目睭，嘴齒賠嘴齒；39 若是我 kā lín 講，莫得 kap pháⁿ 抵敵；若有人 siàn 你 chiàⁿ-pêng ê 嘴 phoé，tò-pêng-ê 亦 oát hō 伊。40 有人 ài 告你，thèh 你 ê 內衫，外衫亦放 hō 伊。41 有人勉強你行一里，就 kap 伊行兩里。42 對你求 ê，hō 伊；beh kā 你借 ê，莫得 oát 走。43 Lín bat 聽見有話講，Tiòh 疼你 ê 厝邊，怨恨你 ê 對敵；44 若是我 kā lín 講，對敵 lín ê，tiòh 疼 in；khún-tiòk lín ê，tiòh 替 in 祈禱；45 hō lín 成做 lín tī 天裡 ê 父 ê Kiáⁿ；因為伊 hō 伊 ê 日起來照 pháⁿ 人 kap 好人，亦用雨 ak 義 kap 不義 ê 人。46 因為 lín 若疼疼 lín ê，有甚麼報賞？hiah-ê 抽餉 ê kiám 無 án-ni 行 mah？47 Lín kan-ta 請安 lín ê 兄弟，有甚麼 khah 贏人？外邦人 kiám 無 án-ni 行 mah？48 所以 lín tiòh⁸⁸ 純全，親像 lín ê 天父 ê 純全。